

Blagéeri

S'Basel Tatooo isch e diggi Sach
Numme mache Böller vyyl z'vyyl Krach
Beheerde dien Luts verbiete und strooffe
E Bebbi muess doch z'Nacht kènne schlooffe
Kaasch froo si wenn no flyschtere darfsch
Morgestraich vorwärts marsch

Uffruume isch nit mini Stèèrggi
D Frau isch suur jo, das mèèrggi
E Ultimatum het sie mir gsetzt
Wenn de nytt machsch wäärde dir d'Aier gwetzt
Die Alti schimpft sisch voller Drägg
I find kai Suuger und dr Blocher isch wägg

Mir drätte uff im „Istanbul“
Im „Chinesefood“ wäärde mir fuul
In „Thai-Corner“ derfe mir aane
Dr „Indian-Palast“ dien mir yyplaane
D'Blagééri sind uf Wältrais gange
Nai, nai, im Glaibasel ùmme g'hange

Im Friejòòr duet e verschwooreni Clique
Fyr d'SVP s'Parteiprogramm strigge
Im Hèèrbscht bi de Waale kunsch nimmi druus
Do schwinge sie ganz obe uus
Wenn's mit de Bängg so wyter goot
Sin d'Blagééri bald im Bundesroot

Alt Bewäärts hinde fiire nää
Duet Erfolg und Schwung dir wiider gää
Mit Streller und Huggel wie me kaa see
Laufts wie gschmiirt bim F C B
Aber Gigi, dues nit yber triebe
Dr Karli muess uff dr Tribüüne blyybe

E Flangge künnt in Strooffruum z'fliege
Ganz aagschtränggt versuecht är, si z'kriege
Dr Stürmer trifft wie vo Gaischterhand
E Goal fir Eeschtrych es isch allerhand
„Wir sannd Europameister“ per see
S'isch jo nur e chlises Dräimmlì gsii

Im Egge hän mir amene Bierli gnippt
Vor Langewyyl fascht iiber s'Gländer kippt
Plötzlig kunnt Lääbe das duet uns gfalle
E Laola-Wälle goot durch d'Halle
Es isch ebbis ganz veruggts passiert
Dr Gooli vom E H C hett e Pögg pariert

Wilsch dusse nit numme Pizza ässe
Und bisch uff Dööner au nit gross, versässe
Im Frindesgrais duesch du beschliesse
Am Stainebärg e Fondue z'gniesse
Aber dert aane ischs e lange Wääg
S'bruucht Archideggt und Dänggmoolpflääg

Mir wänn Europamaischter wäärde
Sait dr Köbi Kuhn und bleibt uff dr Äärde
Dääge, Barnetta, Frei und co
Mien aber ooni Vogel uuskoo
Mir fraie uns s'isch wiirgglig woor
Aber Köbeli sag in weelem Jòr

S'Schwyzzer Fäärnsee mag i nimme gsee
Läbe wie Gotthälf mit Gülle und Fee
Pfaalbuure seesch am Bodesee
Denn wird grötlet mit em Epine
Do schalti ab und liid Quaale
Dä ganzi Saich mimer au no Zahle